

四庫全書

集部

欽定四庫全書

集部

文忠集
目錄

詳校官庶吉士臣范逢恩

侍讀臣孫球覆勘

總校官中書臣朱 鈐

校對官原任編修臣勵守謙

謄錄監生臣于時和

欽定四庫全書

集部六

文忠集目錄

別集類五
明

卷一

奏疏

攝銓稿
典銓稿

副銓稿

卷二

奏疏

撫豫稿

卷三

奏疏

出鎮稿

卷四

奏疏

出鎮稿

南樞稿

讞牘附

東昌存稿

卷五

序

卷六

記傳

卷七

碑銘

行述

祭文

卷八

像贊

疏引

題跋

卷九

詩小東草

石城遊草

卷十

詩餘草

苔雲草

卷十一

詩聞鶴草

留都稿

卷十二

簡牘

臣等謹案文忠集十二卷明范景文撰景文

字夢章吳橋人萬曆癸丑進士授東昌推官
歷官東閣大學士工部尚書李自成陷京師
景文至演象所拜辭闕墓赴雙塔寺旁古井
死順治九年

賜謚文忠給地七十畝建祠致祭事蹟具明史本傳
所著有味鉉堂疏稿思仁堂存稿玉靜閣存
稿且園存稿瀾園存稿餐水齋詩稿諸目其
子毓秀及其甥王孫錫等合編以為此集景

文為莊烈帝所知入閣未五十日而都城淪
破卒能從容蹈義自得所安大節炳然爭光
日月至生平歷官所至亦多引繩切墨持正
不阿史稱其在文選時值魏忠賢魏廣微中
外用事景文同鄉不一詣其門亦不附東林
孤立行意而已是其平裁峻厲而不肯矯激
以取名在明季尤為難得今觀集中攝銓副
銓諸稿所載奏議大抵剴切詳明切中時弊

而撫豫出鎮等稿所載諸疏於興利除害之
方規畫不遺餘力雖遭時艱棘弗獲盡展其
謀猷而幹濟之才實可藉覘崖畧固不獨以
義烈見重矣乾隆四十三年六月恭校上

總纂官臣紀昀臣陸錫熊臣孫士毅

總校官臣陸費擘

五ノヒノ三三

目録

欽定四庫全書

文忠集卷一

明 范景文 撰

一 奏疏

攝銓稿

起廢緣繇疏

題為開讀事文選司案呈到部伏讀恩詔一欸一建言
廢棄并礦稅註誤諸臣已奉遺詔酌量起用其有事關
國本抗言得罪降斥謫戍永錮歿身者吏部作速查開

職名分別奏請召用卹錄欽此夫廢籍諸臣放棄數十年自分已斷溝中無復雲霄之望矣明綸一頒巖穴生色亦諸臣殊遭熙朝盛事也臣部仰奉明詔一朝盡用此百餘人豈非至願而敢有後言但諸臣窮巖沈晦姓名常不時聞黃髮老成存亡亦難具晰倘以既朽之骨復點啟事大典為之不光或以未當之舉啟疑宸衷德意因而中格則臣之所大懼也用是再三躊躕遵明旨除事關國本抗言得罪者查開職名不論存歿另本奏

聞外而建言註誤諸臣灼知最確者先行起補其餘次第採訪不出一兩月而咨諏當無不真不出數十疏而前後亦不相遠況施為有序員缺漸通銓法自不得不爾也惟祈聖明疏上即下用如流水人解積薪則浩蕩之恩於焉可廣而師濟之美於焉立見矣

考選科道職名疏

題為開讀事萬曆四十八年七月二十三日伏讀大行皇帝遺詔內開兩次考選并散館科道俱令授職欽此

又查本年二月內本部題為目前急宜疏通候命諸臣
為第一義萬乞即賜俞允事奉聖旨是欽此本年七月
該本部文選司題為從古無八年久候之臣等因奉聖
旨考選散館各官已遵遺詔補用吏部知道欽此夫以
窮年累月所仰望而不得者一朝立為疏通以千言萬
語所籲請而不得者一旨最為明白諸臣業已連茹而
升臣部無庸補牘以請矣但周朝瑞等職名履歷前疏
未備謹再開具上覽伏祈聖鑒

卹用建儲被廢諸臣緣繇疏

題為開讀事文選司案呈到部為照伏讀詔書內一欵
建言廢棄并礦稅註誤諸臣已奉遺詔酌量起用其有
事關國本抗言得罪降黜謫戍永錮歿身者吏部作速
查開職名分別奏請召用卹錄欽此夫建言諸臣而中
有事關國本者或叩清閣或忤時宰或引義而廷諍或
因人而株連皆成先帝之令德厯宗社之遠慮者也雖
宸衷有主未忍言夾日之功而犯顏不避何可沒回天

之力當其慷慨發言計不反顧時豈知有今日哉而一
斥長廿九死不悔其忠悃良可念也先帝神明不測用
意淵深陰採其言以鞏萬年之慶陽棄其身以貽一生
之名今皇上篤念舊人并其身而顯庸之即歿而不忘
優卹焉固已生輝於巖穴賁彩於泉壤矣亦諸臣千載
一時也臣部仰遵明詔除舊輔王家屏之功存密勿不
敢概叙外其餘疏名上覽伏祈勅下臣部再加查訪存
者不次起用歿者移咨禮部優卹其有一時開載未備

者再行奏聞未敢擅便謹題請旨

起原任戶部主事鹿善繼疏

為計曹念在急公舉朝望切宥過伏祈聖慈免除降以惜
人才以光新政事文選清吏司案呈為照原任戶部河
南清吏司主事鹿善繼公忠不貳足稱社稷之臣沈毅
有為卓為名教之主持節可豎百折籌餉特見一斑相
應請復原職案呈到部為照鹿善繼之被謫也以留籍
金花而其留籍金花也以需餉急於燃眉措餉窮於露

肘聊出此不得已之計耳夫不惜一官以收潰散之軍
心以存殘破之疆土以宣上德意而垂萬世之令名有
臣若此正宜破格獎拔用示風勵而反蒙譴降人其謂
之何先帝神明天縱豈見不及此毋亦以蠲濟之名不
出自上權宜之法徑行自下姑假此以警後來而重朝
廷乎臣部遵旨擬降朝廷之權已伸而今已遵矣疏上
而不報可益見原無成心姑留以待後庸或者別有深
意是未可知也日見皇上慨發帑二百萬搞邊薄海

內外無不仰頌明明后舉動非常夫在內者尚可出之
而宏大賚在外者何不可蠲之以濟急需若鹿善繼者
想亦聖明之所欲急宥也伏祈勅下免其降級照舊復
職邊士聞之必將曰國家未嘗忘我而斷不解體廷臣
見之必將曰國家不肯負人而莫不盡心非特為一人
之官而已也

陞原任御史劉光復疏

題為勲臣效忠可嘉明主錄用難緩伏祈起陞以宏先

德事文選清吏司案呈到部為照劉光復既以言獲罪矣彼其赤忠欲灑臣取其心犯顏不避臣取其氣而孝慈之語奉揚休美亦舉朝所共欲言者不聞有大罪也或但罪其高聲越次耳然覆盆五載已寓磨勵之微權而釋繫一朝彌見浩蕩之德意若竟其所為必能殫竭忠猷報答聖明一以教臣下之忠一以明聖主之孝一以廣先帝之仁一舉而三善備焉伏祈勅下起陞光祿寺寺丞在本官感恩而圖報在諸臣聞風而作忠亦風

勵一大機括也

鴻臚正卿改用甲科疏

為臨御方新朝儀當肅鴻臚正卿改用甲科以復祖制
事文選清吏司案呈照得鴻臚寺正卿自王用賢察處
以後員缺已四年矣先後建言諸臣皆議宜用甲科此
非無據也查得萬曆元年十一月鴻臚寺缺正卿該本
部覆准正卿仍用進士其別途出身者歷俸年深但陞
服俸官至左少卿而止此載在職掌班班可考者嘗有

屠義英以嘉靖丙辰進士由太僕寺少卿改鴻臚正卿
此即先帝初年事也後失其制驟用別途固以其禮度
之素嫻耳然家起胥郎以廁九列之班已自不韻即儀
習綿蕞以示百僚之瞻必且不光雖資格不可局人而
典章自宜還舊今南鴻臚卿余啟元現用甲科何獨於
此而反不然合行亟請案呈到部為照聖主御極中外
具瞻漢官之儀復見於今矣然肅朝常於九重宣法儀
於百辟則鴻臚實司其事而可復以他途混乎若用甲

科則揚眉於濟蹠之列而該寺重樹儀於殿陛之間而
朝廷尊所關亦自不細也既經該司備呈前來相應催
請祈勅下臣部除該寺左右少卿仍用別途聽其禮熟
資深止加服俸正卿一缺務擇中外清望甲科以充斯
任庶儀觀整肅典禮昭明亦維新中一事也未敢擅便
謹題請旨

救吏科給事中周朝瑞免降疏

題為愚忠可鑒聖度宜宏祈恩免降以作敢言之氣事

文選清吏司案呈到部臣等伏讀聖諭內閣朕昨覽文
書見有吏科給事中周朝瑞條議仰獻慎初三要內停
止金花銀兩朕即位之初言路方開礦稅已撤如何擅
行瀆擾此項銀兩原係舊制進內以備萬壽聖節等并
典禮等項及各宮賞賜武職軍官俸糧之用難以停減
周朝瑞這廝要譽妄言本當拿問朕哀思皇考皇妣梓
宮在殯姑從輕降一級調外任用卿可傳示該部這銀
兩還遵照舊規行特諭卿知欽此隨該內閣大學士方

揭帖奉聖旨覽卿所奏朕已悉知周朝瑞這廝不諳事體逞臆妄言擅行議減內庫金花阻絕國用好生可惡周朝瑞已有旨了卿不必申救該部知道欽此欽遵竊念周朝瑞忤觸宸嚴夫何敢言臣部仰遵明旨又何敢言但周朝瑞職居言路遭際明時未忍自負以負主上慷慨發舒故不覺慮之過語之戇耳至所條奏留停金花以寬民力而光上德酌祖制而裕國儲亦忠於皇上之職分也乃皇上罪以要譽妄言夫主聖臣直名在皇

上下亦何譽之可要若因此而罪之則適成其名耳夫當容言之時而有拒言之事恐未免為聖德累也日見皇上用人行政下如流水舉朝相慶皆謂袞職不闕補救無事臣工此時止宜將順德意彼目覩大渙王居不殖貨利已明知上意所嚮矣正所謂善將順者而何深罪乎雷霆一震已惕不測之威雨露雨旋施彌彰有容之度知聖德如天諒必出此也伏祈聖慈免其降謫照舊供職使下有犯顏敢諫之士足見盛世之有人使上有

刻印銷印之舉愈覘聖心之無我其所裨益豈渺小者哉

奏疏

副銓稿

總催大僚考選疏

國家正當全盛朝宇漸見空虛懇祈聖明立允會推考選以備任使以勸治理事文選司案呈到部為照大僚國之股肱無股肱何所依毗言官國之耳目無耳目何由聰明故有憑有翼有孝有德盛世所以興隆也衰世

廷無人焉有人不用自淪於無耳今部院見止五六員
科道見止十數員可謂無人之極矣啟事頻煩不蒙報
可豈以臣部補牘皆為人求官耶即為人求官亦以酬
庸而為官求人乃以集事皇上何疑臣下之深也積疑
成厭既有人不用而積厭成睽究且欲用無人是以臣
所患者官無其人耳人無官又何患焉獨不見夫避難
規便者以無官為幸乎悠悠之口皆謂皇上吝惜爵祿
然此爵祿在人主借以神其鼓舞在臣下借以効其功

名使利吝不予上失鼓舞之權下無功名之地士亦安往而不貧賤者而人主將與誰共治天下乎諸疏現在御前惟皇上留意立賜俞允師濟之盛即在目前勛之効可收異日矣

催大僚疏

為九列多缺時事可慮懇祈聖明速賜簡用以保治安事文選清吏司案呈到部為照國家稽古建官政分六曹有長以提領挈綱有貳以分猷佐理意至深遠也無

事之時得人以勦邳隆多艱之時得人以挽否運而缺人廢事從來久矣皇上試觀近日各部院之官缺耶不
缺耶近日各部院之事廢耶不廢耶綜覈之朝事聽其
廢弛師濟之世人任其空虛所悞者誰之政務所摧者
誰之才賢則皇上自為社稷計者左也今刑部缺尚書
臣部戶部兵部缺左侍郎而工部都察院則三堂全缺
南京戶部禮部兵部俱缺尚書都察院缺左都會推各
官諸疏現在御前惟祈聖上立賜俞允施行

催起廢疏

為起廢原奉特恩俞用難容終靳伏祈渙發以完成典
以維泰運事文選清吏司案呈到部為照起廢一節臣
部言之非臣部亦言之章滿公車無慮數十上矣而比
年以來未見起用一人悠悠之口皆謂皇上有意禁錮
諸臣也者臣伏讀四十一年三月日詔書云云欽此欽
遵十行一下中外動色使當是時仰奉成命漸次叙錄
煥巖穴之光示綸綍之重豈不休哉乃復更端請旨遂

致中格夫煌煌慈詔臣民奉之千萬世垂之可不是遵是依而更於何取旨耶德意原自浩蕩臣部自失奉行罪復何言今日者明布臣部之失於天下亦惟成恩詔之信耳然臣又反覆思之開讀方新原不必於覆請時日既久勢又難於徑行浩蕩德意亦求皇上自始終之而已蓋諸臣之被放也明主豈真有畢世之怒毋亦惡其自為名而以老其才沈其氣乎而困衡磨礪遠者二三十年近者亦十餘年其才已老氣已沈矣使其竭忠

盡節必能為國家擔大事定大難而不撼始也惟皇上成之終也惟皇上用之既已用之矣名於何有惟不用乃有其名耳何也諸臣或慮國本或抗稅監大率事而獲罪者十一言而獲罪者十九吐耿懷亮言而有效適昭主德之媿憂盛危明幸而不驗彌見宗社之福一旦賜環聯翩以起在諸臣止見不測之恩在舉朝止見有容之度有如用其言收其效矣猶今遺逸抑厄不展使追論者舉其遺事曰某某為建儲某某為罷稅某某為

一事註誤而不蒙解網日在人口實間母乃為聖德累
乎舜孝五十而慕千古為昭明詔所及薄海無不傳誦
而獨遺於林莽之英彼不知者謂聖明真有成心渙綸
亦可反汗臣深為皇上惜此名也為此不避忌諱容臣
遵前恩詔陸續列銜題補如是則皇上錫類之孝彌宏
而微臣以人事君之責少塞矣

總催考選疏

為考選原係典章空虛大失政體懇祈聖明總俞兩咨

考選以復祖制以慰人心事文選清吏司案呈為照官
以言名原以用其言非徒用其人也今考選不下而題
差差又不下而九年久候三咨并壅若有意於厭絕言
官也者從來大奸惡大刑獄孰不賴其廓清而奸人猶
有所畏而不敢逞言亦何負於國而必欲厭絕之也況
欲禁其言先錮其人皇上以為言可禁乎哉防川而潰
日後之決裂必多欲挫其人先惜其官以為人可挫乎
哉守株而待正氣之屈抑必甚皇上即欲厭絕之不能

矣徒彰此名於天下耳城門開言路閉宋人舉以為謔而今當城門將閉之日言路猶復不開則有心者之所深恐也用敢不避煩瑣補牘上請伏祈聖明省覽速將癸丑丙辰兩咨考選周朝瑞等立賜允用不特暢七八年久鬱之人情亦所以存二百餘年相傳之典制矣

催丙辰一咨考選疏

為題差原非初制考選早宜允行伏祈聖明速俞丙辰一咨以復舊章事文選清吏司案呈到部為照考選之

法先年每歲一取或間歲一取無有數歲不選逾時不
下者自行取變為留部已失初意矣考選變為題差而
考選之意失題差有下有不下而題差之意亦失失非
聖世所宜有而想亦非明主所樂居也皇上念念法祖
制事事循舊章豈獨於考選一事而疑之今丙辰一咨
現在待命若一時盡下連茹同升在諸臣免於守候壯
敢言之氣鼓任事之心一便也在皇上免於批答明宸
衷之斷昭主權之尊一便也而在臣部亦止有將順有

奉行而免於催請其便不亦大哉惟聖明其利圖之

催癸丑一咨考選疏

為敬循職掌懇祈聖明速俞癸丑一咨考選諸臣以濟
缺乏以光聖治事文選清吏司案呈為照臣以職在用
人而用人之大者無過考選今癸丑一咨候命已八年
矣其時不為不久差用已二十餘人矣其局不可不完
先後催請幾於舌敝頽禿而天聽彌高不見省悟夫以
臣部考選而使諸臣交章共催之猶然不盡下亦臣之

罪也皇上豈真欲奪臣部之職掌耶今見在候命者科
止十二員道止四十三員聖明舉動往往初時持之甚
堅臨時應之當可將勿欲留此盡下於臣部以存一綫
之職掌未可知也伏祈皇上將癸丑一咨即時盡賜俞
允臣部有詞於人皇上有詞於臣部豈止濟萬分之缺
乏而已哉

催補京堂疏

為京堂懸缺甚多積滯難疏懇祈聖明亟賜點用以襄

化理事文選司案呈到部為照國家之用人也雖以採望亦以循資而所推擇為京堂者非望之隆而資之深者不與焉故彬彬有人可以為卿貳可以為鎮撫無難濟前路之窮寥寥無人一壅於臺省再壅於藩臬益成後來之滯今某推某某推某或展采於方面或攄猷於郎曹或蜚聲於言路幾經咨詢而後有此推固其應得之物而未始逾涯也今乃屢推不報既目以為賢而反歷久不轉他人無相觀相勸之思倘時值其窮不免躡

級而升本人有踰尊踰戚之懼壞典章而鬱人情無一
可者各本現在御前伏祈盡賜允用不第酬前勞亦以
儲大用則聖明之所自為社稷計者也

總催兩咨考選疏

為臺省候命彌久得旨甚艱懇祈聖明速賜俞用以充
班行之空虛以存臣部之職掌事文選司案呈國家之
有臺省非徒廣聰明之用亦所以實法從之班今候命
之官多於被命在差之人多於在朝烏臺青瑣寥落

不充人皆曰皇上不用言官也者然科臣有時命之剪
桐矣按臣有時命之持斧矣是諸臣未嘗不用而用人
之權反不操於朝廷是皇上亦未嘗不用諸臣而不用
人之聲獨傳於天下誰司銓衡而令至是諸臣之不得
其言臣部之不得其職皇上用人而不得其名皆自臣
部貽之臣對諸臣何以為顏對天下何以為詞而自對
亦何以為心耶用是不憚頻煩補牘上請伏祈聖明將
癸丑丙辰盡賜允用塞極必通壅極必舒望之皇上明

以得直忠而兼良望之諸臣老臣惓惓之愚盡此矣

總催兩咨考選疏

為耳目萬不可壅臺省萬不可廢懇祈聖明速下考選
諸臣以釋羣疑以光至治事文選司案呈為照言之益
於人國也大矣故昔之聽言者詢及芻蕘得言尚不必
專官豈專官而反使不得言者即昔之拒言者斥及仗
馬亦待其有言而後驅之豈防其有言而豫折之者以
致清華為軟錮之地省臺若閒住之官多年候命者俟

同河清大言叫閤者難同轉石如此景象非特盛世之所無而亦衰世之所未嘗有也臣反覆思之皇上亦時嘗用其言矣用之而效事急亦用其人矣用之而效陰採其言而顯抑其身此有所俞而彼有所禁外議紛紜妄相猜度皇上何以解於人輔臣催考選之揭無數日不上矣皇上允考選之旨經九載不下矣皇上不答輔臣之請以致輔臣無以副中外之望外議紛紜妄為猜度輔臣何以解於人考選臣部之事而題不見報考選

不下臣部之責而催不見報尋常陞除豈足報主疏牘
煩瀆愧未回天即未有以此咎臣者而臣部又何以解
於人臣愧而懼懼而疑真不得其故也然所望皇上自
成其斷者在宸衷之一轉而今臣等并免於戾者亦在
上意之一決耳伏祈聖明即將癸丑丙辰兩咨考選科
道諸臣立賜允用

總催三法司疏

為法署全空國紀盡解伏祈點用以肅久玩以振積弛

事文選司案呈到部為照國家設立刑部以職掌刑名
都察院以總持風紀而訟獄平反則歸之大理寺曰三
法司祖宗創制良有深意以人主所以治天下者法也
無法則不治無人則無法缺一有不可者而今則一時
并缺矣刑部都察院止有張問達一人署理而大理寺
并署印之人無之一切積案乎者誰允疑者誰駁勘理
者誰為轉行無乃法幾頓乎蓋人之所以敢於翫法者
窺人君有輕法之意也上自輕其法不可言也下共輕

上之法益不可言也勢必至裂防潰繩而不可收拾皇
上吝惜爵祿固忍於愛官而慮防銜竊亦忍於廢法耶
臣竊見年來皇上深宮靜攝中外肅然祇憑此法以維
持其間而以無人之故坐致廢弛臣之憂將不知所屆
也臣謹將前後推過職名另本開列伏祈聖明慨賜允
用庶持法有人持天下有法於以整齊海宇裕如矣

催司官疏

為司官多缺部事易廢伏祈欽點以重銓政事文選司

案呈到部為照臣部司官其推擇也省各一人必如是方可詢各省之事也其填補也司各數人必如是方可辦各司之事也其序遷也司各數月而後轉一司必如是方可了各司之事也惟備則久惟久則習惟習則能辦官而不為吏所勝今除未推與推而未下下而未到者共缺七人矣缺則列署而治者事不得不兼條彼條此苦事權之無歸畫方畫員虞精力之難繼不便也缺則拾級而登者轉不得不速規格之相承到手未易周

知條畫之自我徹底又難究竟不便也官方易清吏弊
易滋實在於茲臣方率諸司加意澄叙精心釐剔而乏
人廢務先自臣衙門始目前將有中斷之脉轉盼并無
代庖之人誰為參統鈞以佐聖天子平明之治哉臣謹
將職名開列上請伏祈立賜欽點容臣填補司分具本
題知促令到任管事庶可佐辨官之治無廢事之憂矣

催吏科疏

為首垣空署發憑無人懇祈速允散館之臣以濟急需

事文選司案呈到部為照六科與六曹相關而吏科則與臣部為表裏者也故事章奏奉旨下科看詳事所不可則為叅駁事所當行然後發抄非徒重王言亦所以防奸蔽也頃自張延登請告行後印信塵封將半年矣看詳何人封駁何人發抄又何人也夫無該科則事廢臣部即欲舉之不能也若徑從停閣所悞在政務稍為權宜所亂在典章至畫憑一事又停閣不可而權宜不能者奈何其弗念之也今姚宗文閱視未竣而候命之

暴謙貞誠不可旦夕緩者伏祈勅命即日到店署掌印
信則首垣增重銓務立通非止免選人之守候而已也

催太僕寺少卿疏

為軍興正急問政為先懇祈點用寺臣以圖共濟事文
選司案呈到部國之大事曰戎馬今戎事日飭馬其所
亟需矣然誰司問牧則二三寺臣也今所推王象恒馮
嘉會政旦夕望下以資分理而屢催不報皇上將以為
可缺哉彼其事有專隸一人缺則一事廢也法因人立

缺愈久則廢愈多也獨不見近事乎遣官欲行市賣金
錢之搜難繼贖罪是亦權宜三尺之法不明有人不用
事急而苟且若此為計不亦左耶伏祈聖明於二臣早
賜點用使以乘驄之夙望策簡乘之新猷必大有裨矣

催大理寺疏

為棘司空署祈允見推之臣以重法紀事文選司案呈
到部為照刑者天下之平也必持平有人而後其刑不
忒三尺之法足以取信於天下大理寺固持平之司也

今三堂并缺庭中鞠為茂草矣凡待讞決者待平反者不知其幾而徒以棘司無人
有罪者爰書未定冀倖於脫網無辜者縱釋無因拊心於罹羅長繫園扉天日莫覩今當外患內訌之日而使輦轂之下有嗟怨而不得舒抑鬱而不得寧者非完策也即如矜卹一事皇上行之四十八年不廢而亦以題差無人致逾常期矣竊見聖上每歲停刑豈非好生至德然停每歲不宜停之刑未足見皇恩之浩蕩而廢五載不宜廢之典反以啟普

天之憂疑言念及此皇上仁覆天下之思必油然而動
而俞用寺臣當不待臣言之畢矣伏祈立賜點用施行

奏疏

典銓稿

矢心入告嚴杜請託疏

奏為矢心入告嚴杜請託以清仕路以養士節以佐平明
之治事臣行能淺薄無足比數一壑自甘久已無志世
用矣猥蒙聖恩不棄起之田間俾以典劇自揣病軀綿
力重任難勝兩次具呈堂官求為代題而嚴旨赫然立

催受事臣即沈疴委頓何敢再為偃蹇以緩王程且當
聖明勵精求治德意甚盛臣亦妄思澄清銓序有以上
裨聖治萬一則臣區區私願也今天下仕路混濁極矣
圖職業之念不勝其圖榮進之念愛名節之心不勝其
愛富貴之心舉國若狂嗜進如鶩每怪古今同此人也
何遂茅靡瀾翻一旦至此毋亦衡鑒之地先自不清巧
營者一歲數遷拙守者幾年不調顧天下中人多耳此
實教之使競而欲其淡漠寡營詎可得乎臣即不肖不

願使奔競之風自臣身始竊念除者有歲格其久近不得而私也遷者有資勞其深淺不得而私也特擢者有績望其高下不得而私也一人欲私不可得即欲私人亦不可得斯不亦明白顯易與天下可共循乎若不論三者更於何論其由別徑不問可知將何顏以對天下且年來舞文玩法吏弊叢生幾不可問矣今欲直窮到底一清穴窟而自己先有拖帶打疊不淨官長作事最難欺者左右對此輩又何以為顏臣今與需次諸臣

約一行請託臣不能為之諱臣又與同事諸臣約一聽請託亦願諸臣勿為臣等諱選人如林鱗集都下臣不能一人障其目而箝其口也明矣且臣非故為矯飾不情也誰無交知誰無情面臣亦豈與人異惟是自反生平不愧俛仰一意報國先在不私寧忘交知破情面而必不敢負君父以負此心耳天地人材為天地惜之朝廷名器為朝廷守之天下萬世是非公論與天下萬世共之人還其人我無失我此臣心之可自信者而四方

之人恐未必信臣之素夤緣熟徑入人膏肓不有以力
砥之而競逐無已廉恥風微其為世道安所終也臣故
預揭癡腸苦心道破無非欲天下各圖其職業各愛其
名節淡漠寡營共偕於大道豈曰小補之哉自成成人
之道似無先此除銓政大端稟臣堂官次第上請而夙
昔盟心首以入告伏祈天語叮嚀庶無隕越臣無任激
切待命之至天啟五年二月二十三日奉聖旨這本說
的是以後陞除推用一循資望可挽競風務著實行如

有故違請託的指名叅奏該部知道

覆楚省學道歸併疏

為學政一權兩操楚士分黨鼓譟懇復舊制以安地方
以端士習以光大典事文選清吏司案呈天啟五年二
月十三日奉本部送吏科抄出兵科等衙門給事中等
官王鳴玉等題將荆岳諸府歸併武漢學道兼攝等因
正月二十七日奉聖旨該部酌議具覆欽此欽遵抄出
到部送司相應題覆案呈到部看得各省止一學臣而

并設則自楚始即楚原亦止一學臣而添設則自戊午
始其初或以全楚幅幘延袤二千餘里道遠考試有所
難周人多約束有所不及故竝建兩憲臣以督課之但
初在分轄以專成不虞畫域而多事天下事一則專二
則紛從來然矣如辛酉甲子鼓譟者再見士競立黨勢
類揭竿雖兩道臣同寅協恭袒不分於左右而諸士分
門割戶禍每釀於二三若不早復舊規勢必以械撲薪
樞之地為隸轄介冑之場如科臣所慮率舊無愆紛更

多擾此其一也合無將荆岳諸府併歸武漢學道定限
三年完歲科兩考方與陞轉其荆岳一道永免銓補庶
遲之歲月兩試可以畢完一厥事權學政不致分裂既
經具疏前來相應覆請恭候命下行令該省撫按一體
欽遵查照施行

請廣添註京堂疏

題為奉旨查議添註以通仕路以廣皇仁事文選清吏
司案呈奉本部送吏科抄出大學士顧秉謙朱延禧魏

廣微題稱今早文書官李守質陳國寧發下郭興言一本上傳考選添註著遵前旨行夫考選奉旨遵限四十名矣惟添註一法則臣等竊有請焉前於天啟四年十月內停止添註蓋謂起廢諸臣充塞京堂不得不為之限制也若臺省吏部三衙門於二八月例有歲轉祖宗朝皆從添註若待實缺則十年不得一轉矣此事勢之必不可行者也伏望皇上姑容照舊添註以通陞轉之窮但不許徇情濫轉如近日七八人之多庶於通變之

中猶存限制之意耳等因奉聖旨朕覽卿等奏臺省吏部三衙門於二八月例有歲轉祖宗朝皆有添註但邇年徇情濫轉甚無限制自今以後允卿等所請每歲科中止陞二人道中止陞四人吏部司官止陞二人其科中閏轉道中邊功勞深俱各停止吏部知道欽此欽遵抄出到部送司案呈到部看得京堂近來濫觴已極明旨槩罷添註真是慎重至意而限制之中仍示變通又俯允閣臣之請科道臣屬三衙門特准添註宸衷轉圜

事皆法祖善必從人天下莫不誦聖人之明且斷但藩
臬諸臣為天子屏蔽旬宣一方者也其間資俸深崇者
瓜期已逾竿頭難進使之久居此任在本身居進退之
間使後人礙遷轉之路不惟非人情并非政體也且卓
異特舉例當優處既難盡推開府而又不晉清卿目之
為賢而與不肖者同滯其何以昭風勵而示激勸乎若
待實缺然後陞補則前路一壅中格可虞銓法必處其
窮勢亦不得不為之所也伏祈聖明俯從臣議將藩臬

諸臣亦量添註每歲或二人三人如科道吏部之有定數庶乎內外皆均銓選無礙既經該司具呈前來相應覆請恭候命下臣部遵奉施行

覆調有司疏

為移調首郡首邑官員以清地方以興吏治事文選司案呈云云到部為照今宇內岌岌蓋多故矣羽書旁午徵調繁興戶鮮寧居家無安堵所賴郡縣得人彈壓撫摩得以維持合之成一太平也如汶上南海等處或近

全史卷之三十一
卷一
華神京或遠居海徼或首列雄藩或地當孔道或瘡痍
之未起或釁孽之漸生地之需人日以為歲懸缺既難
久待新任或難遽調今各撫按留心求瘼銳意觀成酌
人地之宜因材器之使諮諏確當列名補牘相應允從
既經查明具呈前來相應覆請恭候命下施行

議裁冗員疏

為議裁冗員節省繁費以甦民困事為照國家設官所
以為民也方今民生困殆日苦多事而說者曰省事不

如省官然或權當獨操者則不可省即或事需分理者亦不必省至於一切冗散多半雜流秩卑而養廉之祿不豐資下而充囊之計多巧不特民苦官而官亦自苦何不可省之有況在庚癸時呼箕斗罔濟司農持籌而仰屋百姓剝肉以醫瘡之日乎若罷不急之官清耗費之竇不特紓民困而亦佐軍需未始非濟時急計也合無將各撫按題裁各官赴部另補遺缺永免銓除恭候命下施行

覆大梁道臣疏

為酌議就近陞補監司以安地方事為照大梁以西則
巡道實分轄之其地山與河錯其人軍與民錯而奸宄
盜賊往往出沒其間誠不可一時缺人者提學副使何
應瑞才兼武緯文經力可肩宏任鉅兩試事竣歷俸已
深就近陞補誠為便計

請告呈附

為因勞成病因病思親懇恩代題早賜生還事竊職藥

棄餘生志絕世用猥以嚴旨敦催誼難偃蹇且堂札數
臨惓切有加顧此殊遇何忍自負力疾出山不揣區區
亦思勉竭愚鈍澄清仕路以仰報朝廷并酬知己夙心
所自矢也十七日入署距大選止有八日職拮据從事
不交睫者數夜僅僅無愆常期而雞肋之體不堪矣二
十五日入朝立看掣籤吐血不止踰時乃甦初猶謂因
勞偶發少息當瘥不意數日以來遍體如蒸眩暈怔忡
一時并作自頂至踵無非痛楚緣職積疴之餘元氣未

復又嬰重勞遂極沈委性命之憂岌岌在目前矣憶職
初就道職母見職帶病出門雪泣霑襟職父雖以大義
相勉而意思鬱苦更甚於哭職此時恐傷親意以淚承
睫不敢下然每一迴念中腸若割今值疾痛夢中頻呼
想父母念職亦應爾爾職即遣人歸聊作平安家報少
慰親懷但職吐血時天下選人衆目共見萬一流傳驚
當如何職因此悲思愈重病勢彌增延醫楊加祚傅懋
光胗視不言脈症何如但言亟宜早歸職所以憂懼

交深躊躇再四而不能已於乞身也伏祈俯垂憫念准
題回籍從此慎醫藥以自輔供菽水以娛親倘苟延視
息皆鴻造所留即終填溝壑亦銜結為報職無任激切
待命之至

二呈

為病勢日深職守難曠祈速允放以重部務事職具呈
請告蒙批本官以夙望被召到任以來裨益部事甚大
曾幾何時輒言休沐宜以國事為重力挽去思也竊職

力疾到任時不滿二旬事僅完一選任過其量罪浮於
功於國家有何裨益乃蒙溫語惓留期望過厚敢不勉
抑去思以副策勵但職之病症已經匝歲之久即今調
理亦非計日可痊劇司難容卧理子舍不禁牽情數念
輾轉病在心頭職把鏡顧影覺形容減平時十之五精
神減平時十之七長安上而措紳下至輿臺莫不知職
之病而此段情事尚未知已人人知職之必去矣若
日日言去而徘徊顧戀天下其以職為何如人衡鑒之

司首重表率已先如此衆何觀焉是其病也猶以瘰曠
廢衙門之事而病而不去也乃以濡忍傷衙門之體職
因此益鬱益病亦不敢徵賜調理之恩矣惟祈速題致
仕回籍或謝此官以厭病魔但不至以抱疴遊子貽老
親之憂曠官病臣妨賢者之路其所裨益似為更大冒
昧再懇無任悚惶

三呈

為親病身病相關益迫再懇速放以盡子情事項職具

呈請告慮及以病憂親猶是意中揣摩然嚙指覺痛此
心已怦怦動矣今日家人馳至傳言職父母聞職吐血
日夜驚憂悲號不止職終鮮兄弟孑然一身與父母相
依為命經月為別輒便神傷家庭每談及絕裾倚閭之
語意色遂爾慘淡不樂今職父書中云誰非人臣而不
惜其勞誰非人子而不愛其體兩老人念兒甚望兒歸
切切矣職讀未竟血淚潺然職母素有痰暈之疾鬱即
舉發倘久望不歸復增前症職真天地間戮民萬死不

足自贖者職思國家恢宏為綱未嘗以仕進之路強人而廣厲微權不過以忠孝之道風世若職偃卧杜門濡忍不決進不足盡忠退不足明孝而浮沈不進不退間且大傷廉恥職即不肖必不敢自外孝治之朝而明良在上遽可使下有忘親之臣乎且堂諭留職將以用職也職方寸已亂不能效用矣用職不若成職予職以官不若予職以命輕重之間不待智者知也今疾勢日漸沈危生死只在奄忽伏祈早題一日早入里門得奉遺

體以慰明發合家感錫類之仁即持朽骨以正首丘亦
弃世矢捐糜之報情亟籲天一字一淚無任激切待命
之至

四呈

為病急意促時刻難待四懇速放以救垂危之命事竊
職三呈控籲亦幾情迫詞窮矣未蒙矜允豈以職飾無
病為有病乎昨日家人倉皇馳至誰不見者職一夜悽
痛增病十分誰不見者若以病誣親以身病欺君即此

便是通天之罪不可勝誅而職敢乎哉憶前歲職父薄
宦吳興病肺幾殆恐至驚職匿不使聞然職見家報朦
朧墨墨心動即介馬而馳水陸三千餘里十日而達榻
前一慰病即霍然爾時真病尚不言病況今言病病何
待言此職所以驚魂墜膽痛切在心若自身狼狽猶是
小事矣夫人孰無病而職偏以病累親人誰無親而職
親偏以子增病方今才賢輩出需次待用何止職一人
而職雁行中斷烏哺牽懷則職一人也前之叱馭為急

君命令之乞骸為紓親懷進退之間皆非得已不然畏
路馳驅尚抱疴而來清署從容乃無因而去耶職言止
矣千言萬語惟有一病千禱萬祈惟求一放放之早晚
實關生死知堂臺必憾然有動也伏祈即賜具題早歸
田里其於職命何異再造職無任懇籲之至

文忠集卷一

欽定四庫全書

集部

文忠集卷三

詳校官庶吉士臣范逢恩

侍讀臣孫球覆勘

總校官中書臣朱鈐

校對官原任編修臣勵守謙

謄錄監生臣于時和

欽定四庫全書

文忠集卷二

明 范景文 撰

奏疏 撫豫稿

撫豫報代疏

為遵旨到任恭謝天恩事臣原任太常寺少卿崇禎二年七月准吏部具題奉聖旨范景文陞都察院右僉都御史巡撫河南等處地方提督軍務寫勅與他欽此欽

遵備咨到臣隨赴鴻臚寺報名謝恩本月都察院到任
領勅辭朝具奏起程於九月二十二日入境該前巡撫
右僉都御史丘兆麟咨送原奉相傳勅諭五道符驗一
道令字旗牌八面副關防一顆并吏書文卷到臣即接
管行事外臣嚮於班行中仰見皇上瑩精治理旰食宵
衣所蒿目而憂悉心而籌者無非為斯民計詔令之頒
炳若日星乃微窺民間不惟不沾此德意并亦不聞此
仁言問誰承宣固撫臣之罪也今皇上不以臣為愚不

肖而使之撫豫既以豫之民生付臣矣從此而休養生息皆臣之責從此而顛連杌隉皆臣之辜皇上所以任臣者何重而臣敢晏然已乎誓當俯竭丹誠肅將明命以下對兩河之民即臣撫兩河亦寧有他謬巧不過就皇上所頒詔令與二三屬吏相黽勉實實行之令百姓實實受之如是而已矣行之歲月吏治民安必有裨益以報皇上若猶是以欺飾以虛應願皇上以斧鉞之罪罪臣臣無所辭各屬諸臣其體臣此意而交相黽勉乎

臣實藉手以免於戾不然而以欺飾臣以虛應臣臣奉
皇上之威靈以白簡從事其又何辭於臣故於受事之
始據其款款如此伏惟聖明裁察

直抉吏治病源疏

奏為直抉吏治病源祈嚴申飭大破積習以風有位事
臣被命撫豫受事已卅月矣懍奉簡書無日不以察吏
安民為兢兢因竊歎今日吏治之病惟有一貪而對症
之藥止惟一廉然貪吏之日多廉吏之日少者其起於

察吏者乎何也吏之能為貪必有才力可恃而吏之敢
為貪又必有牆壁可倚者也其一段翹然自喜之氣既
已譽譽動人而工逢迎善彌縫又能偵上官意而巧中
之相得既深覺察不暇彼之志遂肆膽遂張為所欲為
無復畏忌且分其囊橐供作苞苴延譽多方虛名易起
甚有畏其真援假之羽翼而不敢動者以是薦剡日騰
於上而怨怒日盈於下彈文所列不過一二庸碌悃悞
無華之輩聊充故事而已嗟嗟撫按意向屬官之所奔

走也撫按舉劾屬官之所轉移也而今若此世安得有
吏治乎好官不過多得錢原屬昔人謔語今竟守為秘
訣人見得錢既多又復好官自我通神得力轉相效尤
卓然自立者有幾即謂吏之多貪上官實教之可矣又
何誅焉若其潔己愛民者有顯庸剝民自肥者有重戮
昭昭垂示斷斷不假甄別嚴而賞罰當苟非病狂喪心
誰不自愛其官所謂借其愛官之心以成愛百姓之心
則風勵之善術也昔齊威王不過一霸王烹阿封墨齊

國遂以大治正於風勵天下之術有合耳今皇上銳意
太平將立致唐虞之業而海內未見向風誰司撫綏激
揚無效臣每為痛心思一力破此關然地處睽絕權在
責成無一事不需查議無一官不需開報而又不能為
鈎距之術以耳目人所恃為耳目者惟司道府廳各官
故責成亦宜先自各官始語曰大臣法小臣廉豈廉節
止小臣事哉所謂法者即以廉為法也已不廉而求人
之廉則無法以身教貪而以令責廉則無法所升者不

廉而所墜者不貪則又無法果欲以廉為法則莫如斷饋遺夫饋遺者以交際為名而賄賂為實者也此徑一斷則情面自絕威望自肅上下綱紀相維職事相課了無黏帶而後真是非乃出真勸懲乃行豈不休哉行之歲月而吏治有不變民生有不安臣未之嘗聞故持一廉為對症不若拈一法字法乃祖宗以憲後世皇上以繩羣工者也律云官吏受財者計贓科斷追奪除名饋遺非賊乎枉法者通算全科受饋遺而有曲庇非枉法

乎臣特揭與諸臣約煌煌在上或無敢有越厥志臣若
自言而自背之無所逃說誑之律諸臣而仍不回心以
相應臣請操三尺議其後則諸臣實負功令臣未嘗負
諸臣即負諸臣臣敢負功令哉伏惟天語申飭施行奉
聖旨懲貪責成道府執法禁饋甚得飭吏治之要該部
即與覆行

處置援兵疏

題為應援之兵已發處置之法當預伏祈聖明申諭以

定軍心事臣奉旨征調援兵五千已經遣發於十四日
具疏奏聞矣然發兵者臣之事也而兵頓有地兵行有
次兵餉有糈皆不得不蚤為計處置不蚤惶惶嗷嗷之
衆易至釀亂語曰兵猶火也不戢自焚從來以徵兵階
禍者往往而是臣為此慮一一為皇上陳之憶臣嚮在
里中聞山東發兵軍士借口糧少因而大索致譁臣思
索而後給威損而不足見德故凡安家行糧犒賞器甲
一照往例毫不少減而仍捐俸備花幣牛酒勞之以宣

布朝廷德意人人踴躍而前第所裹糧有限此後轉輸弗繼庾癸易呼其支領之處不可不一蚤定也師之所過荆棘生焉言兵行之易擾也臣於其經臨地方一居一食皆委官先期料理使市不易肆師至如歸第過磁以往非臣所屬萬一止宿無地貿易失平軍民相格別生事端則所傷者多臣雖移咨保定撫臣下檄所屬如臣屬若再奉天詔使軍士聞知此瑣細事亦煩宸念必益感動其次舍之安不可不一蚤定也中州距京師視

各處獨遠故聞命獨後各鎮先到者想分有信地矣官
兵向臣相問臣應以近京地方至問近京何地而臣不
能應也以是衆心惶惑不一夫法不一則玩令不一則
紛此軍中大患也屯駐之所又不可不一先定也至於
遣行之日臣為申明紀律曰兵到宜慎重兵行宜神速
逗留觀望者法無赦今即不宜犯百里趨利之戒而事
出赴義常法難拘其兼程疾趨一日必逾兩舍行後更
遣急足促之絡繹相望不絕於途臣所能為者止此矣

一出境外惟聽將軍令耳臣既不能縮地又不能分身
統領將官亦祈皇上先諭後至之罰以定其心其或無
敢隕越以稽王程乎臣已移駐境上以未奉旨不敢出
疆恭候明命另取進止第心憂削難之兵或至發難故
効此一得伏乞勅下該部再加查議覆請採擇施行崇
禎二年十一月十八日具題奉聖旨范景文督兵赴援
知道了兵如到涿便著在彼守禦未到速赴糧餉該州
設法措給援兵經過地方有司處置務俾得所前已有

旨著再加申飭該部知道

慶賀元旦疏

題為慶賀事臣填撫外鎮提兵衛京恭遇元旦令節際
萬象回春之日正七德成功之時運既與日更新政復
侔乾行始臣瞻天地近向日心殷願附鵷班用申虎拜
獨以派分信地猶隔重閨雖鵠立未與乎在廷而雀躍
倍深於望闕虔以齋沐恭候明綸何任歡忭顛企之至
崇禎二年十二月

恭謝皇賞疏

奏為恭謝皇賞事臣奉命提兵入衛派守阜成門下荷蒙聖恩頒發資賞銀三千一百二十四兩八錢謹就營中恭設香案率將士望闕叩頭外隨即陳白鏗於簷下廣布皇仁推赤心於腹中徧為帝德一時三軍挾纊萬口騰歡臣亦以大賚之豐益篤匪躬之蹇兆解於沛師協以孚臣何勝佩戴之至崇禎三年正月初二日具奏

再謝皇賞疏

奏為再謝皇賞事臣奉命入衛之初部下士卒已荷皇
賞該臣具疏奏謝外為時曾幾何復蒙天恩賚予至再
帑銀三千九百零六兩每名五錢視前更渥顧此鞮鞞
之衆沐隆施之不倦戴大德之難忘激奮自矢其何以
圖報也椎牛飲血各欲剖腹見心秣馬厲兵漸可如臂
使指臣亦藉手以慰下勞愈矢心而懷上眷感深逾萬
恩泱無倫臣何勝銘佩之至崇禎三年正月初七日具
奏

援兵經過處置當預疏

題為援兵處置當預中原空匱堪憂懇乞聖裁以防內
變以安腹心重地事臣連日閱邸報見陝西撫臣劉廣
生延綏撫臣張夢鯨江西撫臣魏照榮鄖陽撫臣梁應
澤聞警入援俱絡繹在途矣陳師鞠旅以衛王室者自
臣子之誼但道路經臨有一不取途中州者乎中州四
衝之地縮穀諸省諸省以一方之事為事而中州則四
方之事皆其事也凡此帶甲荷戈多無義之人又操不

仁之器紛囂甚易約束甚難一失約束而害必有受之者非經臨地方耶使地方安受其害害不可言也使地方不安受其害害愈不可言也即令人盡贏糧士無枵腹而安頓之次食飲之方軍民主客間猶不能保其無事况未必然乎今准陝西督臣楊鶴咨稱遣總兵官楊麟統領官兵三千二百餘員名馬騾四千九百餘匹頭應用糧料速行預備等因到臣臣亦提兵入援者也安家行糧皆出本省悉索以從未嘗煩及三輔而諸省遂

欲問及不腆之中州他雖未至秦中已若此矣誰非人
臣總皆王事敢不檄下所司以戒以備第未明言某項
京邊正額既已星催如雨別項挪借又復搜括一空萬
一彼無所攜而來此無所取以供小為脫巾之呼大為
揭竿之變飢民易與為亂此必至之勢也今汝南河北
一帶滿眼災荒流移載道臣鯁鯁懼旦夕有不可知之
變猶冀孱弱窮民勢孤膽怯不能倡始未必遽興大難
若饑兵與饑民合而大亂從此起矣亂起而有以制之

尚可不至決裂今征調已虛戎伍未補倉卒之間誰為
撲滅中原一有搖動其費收拾更大可不為寒心乎臣
雖親鈐鐫之事實有封疆之責每一迴念中夜徬徨敢
嘔心洒血實以告請君父伏祈勅下該部查議援兵經
過錢糧動支何項妥頓應用何人如京邊難動便無處
法亦須速諭該撫自行帶解供用軍前勿使臨期起釁
致生他虞但得腹心無恙天下事尚可為也臣在都門
行文所屬往來之間動經旬日事變叵測常在呼吸更

祈宸裁早賜定奪施行崇禎三年正月十三日具題奉
聖旨援兵自攜行糧前已有旨據奏經過需給不妨權
宜事後還補范景文移會按臣料理該部知道

辭免新命疏

奏為佐樞重任庸劣難勝懇乞聖慈俯容辭免以安愚
分以重兵政事崇禎三年三月二十五日准吏部咨為
缺官事該本部會官具題奉聖旨是范景文陞兵部添
註左侍郎欽此欽遵備咨到臣隨恭設香案望闕叩頭

謝恩外伏念臣才非適用守未通方皇上忘其譴陋而命之佐樞念此恩私誓竭頂踵以圖報稱夫何敢辭且當戎馬生郊宵旰未釋苟効一得以仰副焦勞自屬臣子本分亦何忍辭而第度時量力有不容冒昧者夫中樞一席以控九塞以總六師而參帷籌裨廟算則貳樞所有事也此惟精嫺方畧方勝其任而愉快而可易言乎孔子之對衛公曰軍旅之事未之學也天下事未有不學而能而兵事為甚其所謂學者身曾涉歷手曾營

綜心思曾籌畫而後肯繁熟嘗窺會巧中咄嗟四應恢
有餘地也如臣起家章句一行作吏止知簿書已耳生
長之地既非邊方宦遊所到未親行陣即近聞警入援
倉皇誓師所至帖然惟持一點忠義為之激發感動猶
是書生伎倆而索臣以六韜三畧之妙動天潛地之奇
槩乎其未有也臣嘗謂材局本自天分各有能有不能
人不可以自強而國家亦不可以之強人用違所長古
為大戒以臣蹠蹠之蹤硜硜之節以受任一方凜躬端

範嘔心求瘼或可稍自黽勉然而拘攣太過足槩生平其非司馬之料也明矣我皇上勵精圖治式序在位固將因能授任即事課功軍國大計更所慎重今在廷在籍濟濟多材豈乏頗牧其人足當此選奈何以素不知兵之人而漫以兵事嘗也且臣此一來灑血赴義以入衛也國難未平而驟遷一官如此心何臣抑有以自審矣才品不在人先俸次又居人後聞命若驚義罔敢受此所以中懷跼蹐不得不披瀝於聖明之前也伏祈聖

慈俯鑒悃誠收回成命別簡才賢以佐中樞庶徵臣無負乘之羞本兵有得人之效亦皇上所以為軍國計也臣無任激切待命之至崇禎三年三月二十五日具奏奉聖旨佐樞需才范景文已膺簡命著即速到任不准辭該部知道

革大戶行召募疏

題為革除民生第一苦累以期久安長治事臣當奉命撫豫之初日思所以撫之之方而求一當也惟是與民

休息為第一義顧今天下民生瘁矣或困於水旱此患在天者也或屬於盜賊此患在人者也尚可隨時補救隨地銷弭不至大苦獨官患苦之而莫可解免則莫如差役臣請得而悉數之如錢糧之收有收戶解有解戶驛遞有馬戶供應有行戶皆僉有力之家充之名曰大戶固曰有田則有賦有賦則有庸則壞作貢理或然也而所僉實非真大戶何也大戶之錢能通神力能使鬼不難倖免而免脫雉羅大半中人耳中人之產氣脈幾

何役一著肩家便立傾一家傾而一家繼一家繼而一家又傾輾轉數年邑無完家矣即彼所謂能通神能使鬼以免一時者亦漸日朘月削免與不免同歸於盡此不水旱而荒不盜賊而惜者也豈不痛哉往時建議者心隱之變為條鞭法以闔境之力役均於闔境之丁糧此其苦宜少蘇矣而試觀民間有不經年累月奔命於公家者為誰有不賣妻鬻子罄貲於津賠者為誰是條鞭之行者自行而大戶之革者未革也總之役在民則

官便役在官則民便此不兩利者也便在民則民不欲革
便在官則官不欲革此不兩立者也夫官民之不相勝
也久矣有司官即不無念及民瘼者無如胥徒之中為
格何蓋僉派一行則手得高下口得低昂日市其重於
民間而民奔走以奉之嗟嗟民間天子藏富之地而反
為彼外幣以致官日富而民日貧在官之人日富而民
日貧民貧矣國安得富私費多而公賦誣此必至之數
也臣刻心蒿目議下有司實行條鞭之法一切差役俱

歸之官錢糧官雇人收為議廩餼官差人解為議盤費
倉漕為之議脚價官委人置驛遞為之議芻豆官募人
養供應以市值平買不立官價名色凡夫傾銷添搭幫
賠之費徹底蠲除百年患苦一旦灑然不亦快乎是非
移民之害於官也官任之而害自減耳官自經手官自
留心金錢無所容其穴窟倉箱無所容其耗蠹郵驛支
應無所容其冒破在民免於害而官亦并受其利所不
利者獨胥徒耳置官以為民豈為胥徒哉有如日與胥

徒比而陽奉陰違名去實存者斷以白簡隨其後從此
百姓自辦正稅而外足不至官府目不見青衣日惟含
哺鼓腹以嬉遊於化日是亦一時華胥也即猝有水旱
盜賊亦有以待之豈足為厲哉鄉臣司理東昌曾行此
法歲所省以數萬計東人至今思之臣不揣欲以已効
之法試之兩河以起沉痾將欲使兩河亦如二東也而
今量移矣人去法更久將復斲所關於民生休戚者最
大故特披瀝於聖明之前其中條款頭緒繁多不敢一

一瀆覽而略陳其大端如此臣謹會同巡按河南監察御史吳姓具疏以聞伏乞天語申飭即著為令敢有變法虐民者官吏議處叅究不少貸將休養既久物力漸充久安長治端必繇之矣崇禎三年四月初十日具題奉聖旨體恤民隱是撫按第一急務這奏內革僉派行召募飭吏治安民最得要領便著定為例勿輕變更該部知道

直陳除害安民諸款疏

題為直陳除害之事伏祈天語申飭以安民生事臣聞
巡撫之任曰保釐釐之所以保之也臣承乏撫豫兢求
所不負簡書者因思中州係天下腹心動關四方安危
而四方之安危亦莫不與中州相關地稱重焉臣日延
問長吏士紳以及鄉之長老大約不越興利除害四字
而舍除害無興利法有官害民者有民自害者除官所
以害民者而民利矣除民之自相害者而民之良者利
矣不關心未見其為害一下手彌覺其難除臣一月有

餘頗得要領已下所司徧檄行矣而即息息入衛以來
臣若在事惟即事課效原始要終無須饒舌而今量移
矣不敢不一言以聞當宁漢臣曰為政不在多言顧力
行何如耳苟不能行何貴於言苟欲行之何可無言特
條列其大端以瀆聖鑒伏祈一申飭焉

一加耗夫錢糧之苦加耗此風幾徧海內矣而中州以
多特聞夫豈盡然亦良吏之所務白也大抵納糧之多
者加耗猶少而納糧之少者加耗獨多以為官自染指

耶剝百姓之脂膏潤一己之囊索何以為民父母以為
經手侵漁耶壞一己之名節肥各役之身家何以為民
上自己得之謂之貪各役得之而不覺察謂之昧而其
害與貪等加耗之害臣所痛革者一

一苛罰夫罪之有贖也其古金矢之遺乎然笞杖折贖
律著明條而不論事之大小一槩罰穀彼固曰入倉備
賑也乃動輒折銀則入橐矣少有七八石多有十數石
者甚至犯笞而踰城旦之費此可為訓耶贖固因罪罰

則何名苛罰之害臣所痛革者一

一私派夫錢糧徵收自有款項未有敢私派者而中州
往往獨有或舊額之偶詘焉則派之民間以益之或公
費之難省焉則派之民間以充之蠢茲小民身不入市
井目不識功令片符朝下敲扑隨之嗟嗟一鎰一銖孰
非脂膏遼餉疊加徵求無藝惟正之供尚不能完民窮
財盡豈可蘊崇之又行火耶私派之害臣所痛革者一
一健訟夫民間諸苦皆官擾民而民自擾者則健訟之

輩有其事而訟之飾小為大為因風之吹者常也無其事而訟之漫天說謊為無影之吠者變矣有一事而此狀未銷彼狀又下前官已結後官又告者不株而連因節生枝又變矣自己之情已破借他人以求伸近地之局已完冒異籍以拖累經年經月彼此關提官府已受其玩弄善良能當其魚肉乎健訟之害臣所痛革者一假盜夫民苦於盜嚴緝之而盜自盡則緝盜所以安民也而又有因緝盜反為民害者則捕役之假盜行詐

為禍烈也以賊為竒貨名曰作眼以賊為寶跡名曰認窩自白役入妄攀之家非青蚨無脫身之路此與綠林強寇異事而同患者也假盜之害臣所痛革者

一

一窩訪夫人之所以畏官者以其權能賞罰人生死人也而有以細民竊官司之權而生殺之賞罰之誰不畏之如虎曰窩訪彼其人憑城負嵎內外勾通虛撫事件不妨李戴張冠巧立款單每至甲移乙室令受害者撫

心自慄莫知從來非但平庶遭其網羅而官司并墮其
雲霧此夫為盜而不操弧矛攻而不用弦刃者也窩訪
之害臣所痛革者一

崇禎三年四月二十四日具題奉聖旨范景文條奏吏
治有裨安民這各款著與飭行該部知道

備陳中州地方情形疏

題為微臣得代謹述地方情形以祈聖鑒事臣嘗考豫
居九州之中間域函夏其於四方如車之有轂戶之有

樞所謂腹心也譬人腹心一得其理咽喉臂指俱可提
掇通靈而此處受病肢體隨之矣故四方有事豫常居
中以應之而中原有事四方力所不能為其勢然也然
則祿合國家元氣者當自中州始向來中州號稱無事
自臣入境而後知非無事也河之北苦旱千里赤地河
之南苦水一望白波饑民已不聊生矣而兩河間皆苦
盜綠林嘯聚日不絕聞民窮而盜易起盜起而饑民附
之將禍至之無日也而更有邪教一種憫然以姦雄自

命其口譚非仙非佛其期待為帝為王其受用好色貪財其結果成佛作祖原蓄不軌之謀故創不經之說初不過一二點者主盟號召寃也遠近奔走蟻附蜂合煽動勾連不疾而速如北直之澶滑南直之淮徐山東之曹濮實繁有徒中州則其曼衍穴窟之數先年固始之變已見於前事矣臣未見其形先察其影日與按臣鯁鯁憂之嚴督郡邑飭必有加將瘳此腹心之疾而有不能頃刻釋者深見此輩其志大其機深其黨眾伏戎在

莽乘隙颺興當此邊圉告警之日正屬奸宄竊發之會
果未幾鄆陵以王進孝等告內鄉以余學文等告五營
賊徒且近儀封界上其先發者耳而旋皆殲滅何以得
此哉則按臣吳牲任事有以伐其謀而褫其魄也當臣
提師入衛戎伍空虚人心搖動牲駐會城召兵補伍魚
麗鶴列組練色生復渡河揚兵滏上簡鄉勇行保甲賑
饑荒臣即飛檄如雨終是鞭長不及按臣時進有司面
授方略故祥符則擒時堯相杞縣則擒魏景吾鹿邑則

擒張明山而睢陳道叅政劉餘祐歸德府知府董嗣謀
推官萬元吉則擒李慎吾李小泉張自友等皆兇魁巨
惡逆謀叵測耽耽睥睨坐以觀天下之變者也據諸奸
口供尅期約會先取汴城以為根本聽之令人心寒向
非謀先未雨功預徙薪則二室三川之間并受荼毒尚
得有寧宇耶故事兵馬錢糧皆撫臣為政而按臣第持
惠文法稽覈之今臣責任并於按臣而性忠勤任事勞
怨不辭十分才力又足以副之故能再造兩河以幸旦

夕之安而未可謂無事也懲前毖後可一日少重臣料理哉伏祈聖明俯鑒按臣前勞仍勅新撫臣回鎮共圖消弭地方幸甚崇禎三年四月二十六日具題奉聖旨據奏中外民饑盜起邪教煽動吳姓才能賑荒弭變知道了新撫郝士膏俟俟恂赴昌交代去該部知道

文忠集卷二